

Bosna i Hercegovina  
Federacija Bosne i Hercegovine  
**KANTON SARAJEVO**  
**MINISTARSTVO UNUTRAŠNJIH POSLOVA**  
**UPRAVA POLICIJE**  
Komisija za izbor  
**SARAJEVO**

Na osnovu člana 55. Zakona o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20), člana 75. Zakona o unutrašnjim poslovima Kantona Sarajevo ("Službene novine Kantona Sarajevo", br. 1/16, 26/19, 31/19 i 39/20), člana 11. Pravilnika o sadržaju načinu i rasporedu testiranja i sistemu bodovanja kandidata u procesu odabira policijskih službenika u Upravu policije Ministarstva unutrašnjih poslova Kantona Sarajevo ("Službene novine Kantona Sarajevo", broj: 18/21), Odluke policijskog komesara o popuni radnih mjesta policijskih službenika u početnom činu „policajac” br. 02-41/21 od 17.05.2021. godine, Zaključka Vlade Kantona Sarajevo broj: 02-05-30090-10/18 od 16.08.2018. godine i Rješenja o imenovanju Komisije za izbor broj: 02/5-1-30-1-2330 od 18.05.2021. godine, Komisija za izbor Uprave policije Ministarstva unutrašnjih poslova Kantona Sarajevo, o b j a v l j u j e

### **JAVNI KONKURS**

#### **za popunu slobodnih radnih mjesta policijskih službenika u Upravi policije Ministarstva unutrašnjih poslova Kantona Sarajevo u početnom činu "POLICAJAC"- 200 izvršilaca**

#### **A. Opšti i posebni uslovi za zapošljavanje**

Za zasnivanje radnog odnosa policijskih službenika u početnom činu "POLICAJAC" kandidati moraju ispunjavati opšte uslove predviđene članom 52. Zakona o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20, u daljem tekstu: Zakon) i članom 8. Pravilnika o sadržaju načinu i rasporedu testiranja i sistemu bodovanja kandidata u procesu odabira policijskih službenika u Upravu policije Ministarstva unutrašnjih poslova Kantona Sarajevo ("Službene novine Kantona Sarajevo" broj: 18/21, u daljem tekstu: Pravilnik), i to:

- državljanstvo Bosne i Hercegovine,
- životna dob između 18 i 27 godina života (uključujući 27. godinu života),
- najmanje IV stepen školske spreme,
- da je fizički i psihički sposoban za obavljanje policijskih poslova,
- da nije otpušten sa bilo koje pozicije u organima državne uprave, institucije sa javnim ovlaštenjima na svim nivoima u Bosni i Hercegovini ili vojne službe u Bosni i Hercegovini kao rezultat disciplinske sankcije,
- da protiv njega nije pokrenut krivični postupak i da nije izrečena pravosnažna kazna zatvora za krivično djelo, osim za krivična djela protiv bezbjednosti saobraćaja, u skladu sa krivičnim zakonodavstvom,
- da nije odbio da se pojavi pred Međunarodnim krivičnim tribunalom za bivšu Jugoslaviju kao lice optuženo od strane tog tribunala.

Opšti uslov koji se odnosi na životnu dob kandidat za kadeta mora ispunjavati na dan objave javnog konkursa.

Osobe kojima je UN/IPTF odbio certifikaciju dužne su u pisanoj formi iznijeti razloge odbijanja certifikacije i dostaviti primjerak relevantnog dokumenta UN/IPTF kojim se potvrđuje odbijanje certifikacije u skladu sa članom 131. Zakona o policijskim službenicima Kantona Sarajevo, te se ove osobe izuzimaju od primjene kriterija koji se odnosi na životnu dob kandidata.

Pored opštih uslova koji se odnose na prijem u radni odnos policijskih službenika, kandidati za prijem moraju ispunjavati slijedeće posebne uslove predviđene članom 53. Zakona i članom 8. Pravilnika, i to:

- da nema sigurnosnih smetnji shodno utvrđenom stepenu tajnosti za radno mjesto u skladu sa Zakonom o zaštiti tajnih podataka ("Službeni glasnik BiH" br. 54/05 i 12/09),
- da ima propisane psihofizičke sposobnosti potrebne za obavljanje poslova policijskog službenika u skladu sa Pravilnikom o kriterijima i načinu utvrđivanja zdravstvene sposobnosti policijskih službenika Uprave policije Ministarstva unutrašnjih poslova Kantona Sarajevo ("Službene novine Kantona Sarajevo" br. 44/19 i 50/20),
- da ima položen vozački ispit "B" kategorije.

## **B. Dokumentacija kojom se dokazuje ispunjavanje opštih i posebnih uslova za zapošljavanje**

### **Neophodni dokumenti koji se dostavljaju uz prijavu na javni konkurs:**

- dokaz o državljanstvu BiH - uvjerenje o državljanstvu BiH (pod važećim uvjerenjem o državljanstvu podrazumijeva se uvjerenje koje nije starije od 6 mjeseci, pri čemu se navedeni rok računa od dana izdavanja uvjerenja od nadležnog organa do dana predaje prijave na javni konkurs),
- izvod iz matične knjige rođenih,
- dokaz o završenom IV stepenu školske spreme (nostrificirana diploma, ukoliko škola nije završena u BiH ili je diploma stečena van BiH nakon 06.04.1992. godine),
- potvrda ili uvjerenje poslodavca - organa državne uprave ili institucije sa javnim ovlaštenjima na svim nivoima u Bosni i Hercegovini ili vojne službe u Bosni i Hercegovini, da kandidat nije otpušten sa bilo koje pozicije kao rezultat disciplinske sankcije (za kandidate koji su bili ili su još uvijek zaposleni u organima državne uprave ili institucijama sa javnim ovlaštenjima ili vojnoj službi), odnosno ovjerena izjava kandidata da nije otpušten sa bilo koje pozicije u organima državne uprave, institucije sa javnim ovlaštenjima na svim nivoima u Bosni i Hercegovini ili vojne službe u Bosni i Hercegovini kao rezultat disciplinske sankcije (za kandidate koji nisu niti su bili uposlenici organa državne uprave ili institucija sa javnim ovlaštenjima ili vojne službe). Ovjera izjave vrši se kod nadležnog organa,
- Izjava kandidata ovjerena od strane nadležnog organa da kandidat nije odbio da se pojavi pred Međunarodnim krivičnim tribunalom za bivšu Jugoslaviju kao lice optuženo od strane tog tribunala,
- Lica iz člana 131. stav (3) Zakona dužna su dostaviti ovjerenu izjavu o razlozima odbijanja certifikacije i original ili ovjerenu fotokopiju relevantnog dokumenta UN/IPTF-a kojim se potvrđuje odbijanje certifikacije.

Komisija će na osnovu broja vozačke dozvole koji su kandidati obavezni navesti u Prijavnom obrascu (Prijava na javni konkurs), po službenoj dužnosti, putem nadležne organizacione jedinice, vršiti provjeru vjerodostojnosti vozačke dozvole za uspješne kandidate sa bodovne liste (za broj kandidata koji odgovara oglašениh broju radnih mjesta).

Ogledni primjeri traženih izjava kojima se dokazuje ispunjavanje opštih uslova dostupni su u prilogu javnog konkursa na internet stranici Ministarstva unutrašnjih poslova Kantona Sarajevo (<https://mup.ks.gov.ba/>).

Komisija će uslove koji se odnose na fizičku i psihičku sposobnost za obavljanje policijskih poslova, činjenicu nepokretanja/pokretanja krivičnog postupka i neizricanja/izricanja pravosnažne kazne zatvora, kao i postojanje propisane psihofizičke sposobnosti potrebne za obavljanje poslova policijskog službenika, iz člana 52. stav (1) tačka d) i f) i člana 53. tačka b) Zakona, odnosno člana

8. stav (1) tačka d) i f) i stava (2) tačka b) Pravilnika, utvrditi po službenoj dužnosti i to za uspješne kandidate sa bodovne liste (za broj kandidata koji odgovara broju oglašanih radnih mjesta).

Uslov koji se odnosi na nepostojanje/postojanje sigurnosnih smetnji Komisija će utvrditi po službenoj dužnosti putem nadležne organizacione jedinice, nakon što policijski komesar odobri konačnu listu kandidata predloženih za osnovnu obuku za kadete. Kandidati će biti podvrgnuti sigurnosnim provjerama u skladu sa Zakonom o zaštiti tajnih podataka („Službeni glasnik BiH“ br. 54/05 i 12/09) i podzakonskim propisima donesenim na osnovu navedenog zakona, za stepen tajnosti „POVJERLJIVO“.

Ukoliko se utvrdi da postoje sigurnosne smetnje, kandidat se ne uvrštava u konačnu listu kandidata predloženih za osnovnu obuku kadeta i isključuje se iz dalje procedure, a upražnjena pozicija se ne može popunjavati sa drugim kandidatima koji su učestvovali u proceduri.

### C. Vrste testova koji kandidati polažu

Kandidati koji ispunjavaju opšte i posebne uslove, izuzev uslova koje policijski organ utvrđuje po službenoj dužnosti u toku postupka za izbor, te koji su podnijeli potpisanu pismenu prijavu na propisanom obrascu i koji su podnijeli svu traženu dokumentaciju, imaju pravo pristupa testiranju, koje u skladu sa članom 57. stav (3) Zakona i članom 15. Pravilnika uključuje slijedeće:

**a) test opšteg znanja** - po ispitnim pitanjima sa liste pitanja koja za tekuću godinu utvrđuje policijski komesar, koja se objavljuju do 10. januara na zvaničnoj web stranici Ministarstva;

**b) test fizičke sposobnosti;**

**c) intervju (za kandidate koji ostvare jednak broj bodova);**

**a) Test opšteg znanja** sadrži pitanja sa Liste ispitnih pitanja za test opšteg znanja - čin “policajac” koja je za tekuću godinu utvrdio policijski komesar, a koja su objavljena 07. januara 2021. godine na zvaničnoj web stranici Ministarstva (<https://mup.ks.gov.ba/>).

Test opšteg znanja boduje se u rasponu od 0 do 50 bodova, a eliminacioni prag za test opšteg znanja iznosi 60% od maksimalnog broja bodova koji se mogu ostvariti u ovoj vrsti testa.

Vrijeme testiranja iznosi 90 minuta.

**b) Test fizičke sposobnosti** obuhvata četiri discipline (beep test, sklekovi, trbušnjaci i skok udalj iz mjesta) i provodi se prema standardima fizičke sposobnosti utvrđenim u tabelarnim prikazima koji su dati u Prilogu 2. Pravilnika o sadržaju načinu i rasporedu testiranja i sistemu bodovanja kandidata u procesu odabira policijskih službenika u Upravu policije Ministarstva unutrašnjih poslova Kantona Sarajevo („Službene novine Kantona Sarajevo“ broj: 18/21), a koji je objavljen u prilogu ovog Konkursa na oglasnoj ploči i internet stranici Ministarstva.

Utvrđeni standardi fizičke sposobnosti uvažavaju tjelesne sposobnosti uzrokovane biološkim razlikama između muškaraca i žena.

Metodologija provođenja testa fizičke sposobnosti objavljena je u prilogu ovog Konkursa na oglasnoj ploči i na internet stranici Ministarstva.

Kandidat je obavezan prije pristupanja testu fizičke sposobnosti potpisati Izjavu da dobrovoljno pristupa testu fizičke sposobnosti, te da je upoznat da u slučaju njegovog povređivanja ili drugog oblika narušavanja zdravstvenog stanja, Uprava policije ne snosi nikakvu odgovornost.

Test fizičke sposobnosti boduje se u rasponu od 2 do 20 bodova, a eliminacioni prag za test fizičke sposobnosti predstavlja rezultat ispod zadovoljavajućeg minimuma utvrđen za svaku disciplinu koja je obuhvaćena testom fizičke sposobnosti. Ukoliko kandidat u bilo kojoj od četiri discipline ne ostvari zadovoljavajući minimum, odnosno ne ostvari rezultat od minimalno 2 boda, nije zadovoljio minimum standarda i isključuje se iz daljeg procesa testiranja.

### **c) Intervju**

Za kandidate koji ostvare jednak broj bodova Komisija će provesti intervju. Intervju se provodi samo za posljednje rangirane kandidate koji ostvare jednak broj bodova u odnosu na oglašeni broj slobodnih radnih mjesta.

Intervju se boduje u rasponu od 0 do 10 bodova, a bodovi ostvareni na intervjuu se odnose samo na kandidate za koje je i proveden ovaj test, a ne na ostvarene bodove drugih kandidata koji učestvuju u procesu testiranja.

Intervju će se provoditi na način da se svakom kandidatu postave dva identična pitanja. Prvo pitanje će biti postavljeno sa Liste pitanja koja je za tekuću godinu utvrdio policijski komesar, a koja su objavljena 7. januara 2021. godine na zvaničnoj web stranici Ministarstva, a koje nije obuhvaćeno testom opšteg znanja. Navedeno pitanje bit će iz oblasti Zakona o policijskim službenicima Kantona Sarajevo ("Službene novine Kantona Sarajevo", br. 38/18, 26/19 i 39/20).

Drugo pitanje sadržavat će praktičnu situaciju iz oblasti bezbjednosti saobraćaja, kroz koju će se cijeliti osobine kandidata koje su bitne za obavljanje policijskih poslova i zadataka (komunikativnost i sigurnost u interpretaciji konkretne situacije kroz koju se može uočiti poznavanje propisa). Intervju sa kandidatom ne može trajati duže od 30 (trideset) minuta.

### **D. Bodovanje kriterija propisanim Uredbom o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i općinama u Kantonu Sarajevo ("Službene novine Kantona Sarajevo", broj: 37/20)**

Nakon provođenja testa opšteg znanja i testa fizičke sposobnosti i izvršenog bodovanja istih, za kandidate koji su ostvarili eliminacioni prag na navedenim testovima, a koji spadaju u korisnike prava po Uredbi o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i općinama u Kantonu Sarajevo ("Službene novine Kantona Sarajevo", broj 37/20, u daljem tekstu: Uredba), vrši se dodatno bodovanje kriterija koji su propisani navedenom Uredbom.

Kriteriji i vrednovanje propisani navedenom Uredbom provode se u skladu sa odredbama ove Uredbe i Instrukcije o bližoj primjeni kriterija vrednovanja prema Uredbi o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i općinama u Kantonu Sarajevo ("Službene novine Kantona Sarajevo", broj 38/20), a koje su dostupne na internet stranici Ministarstva (u odjeljku Propisi - Propisi KS).

Status korisnika prava po navedenoj Uredbi kandidati dokazuju sljedećom dokumentacijom:

#### **1. Član porodice šehida/ poginulog, umrlog i nestalog branioca:**

- Uvjerenje o statusu djeteta šehida-poginulog, umrlog i nestalog branioca,
- Rješenje o priznatom pravu na porodičnu invalidninu za suprugu šehida - poginulog, umrlog i nestalog branioca,
- Uvjerenje o učešću u Oružanim snagama za šehida-poginulog, umrlog i nestalog branioca, Organ koji izdaje naprijed navedenu dokumentaciju: Općinska služba za boračko-invalidsku zaštitu, Grupa za pitanja evidencija iz oblasti vojne obaveze prema mjestu prebivališta.

#### **2. Ratni vojni invalid:**

- Rješenje o priznatom svojstvu ratnog vojnog invalida; Organ koji izdaje naprijed navedenu dokumentaciju: Općinska služba za boračko-invalidsku zaštitu;

#### **3. Dobitnik ratnog priznanja i odlikovanja:**

- Rješenje o priznatom pravu na mjesečno novčano primanje dobitniku priznanja;

Organ koji izdaje naprijed navedenu dokumentaciju: Općinska služba za boračko-invalidsku zaštitu;

#### **4. Demobilizirani branioци:**

- Uvjerenje o učešću u Oružanim snagama;  
Organ koji izdaje naprijed navedenu dokumentaciju: Grupa za pitanja evidencija iz oblasti vojne obaveze prema mjestu prebivališta;

#### **5. Dijete:**

##### **a) ratnog vojnog invalida**

- Uvjerenje o statusu djeteta ratnog vojnog invalida, Rješenje o priznatom pravu na invalidninu,  
Organ koji izdaje naprijed navedenu dokumentaciju: Općinska služba za boračko-invalidsku zaštitu;

##### **b) dobitnika ratnog priznanja i odlikovanja**

- Rješenje o priznatom pravu na mjesečni novčani dodatak.  
Organ koji izdaje naprijed navedenu dokumentaciju: Općinska služba za boračko-invalidsku zaštitu;

##### **c) demobiliziranog branioca**

- uvjerenje o učešću u Oružanim snagama  
Organ koji izdaje naprijed navedenu dokumentaciju: Grupa za pitanja evidencija iz oblasti vojne obaveze prema mjestu prebivališta;

Uz dokumentaciju kojom dokazuju svoj status pripadnosti braniteljskoj populaciji, kandidati su dužni dostaviti dokumentaciju koja ne može biti starija od dana objave Javnog konkursa, a kojom dokazuju da imaju prijavljeno prebivalište/boravište u Kantonu Sarajevo i da se nalaze na evidenciji nezaposlenih lica u JU "Služba za zapošljavanje Kantona Sarajevo" ili da su zaposleni sa nižom stručnom spremom od one koju posjeduju, i to:

- Dokaz o prijavljenom prebivalištu/boravištu u Kantonu Sarajevo: Obavještenje da je uveden u evidenciju prebivališta/boravišta sa ličnim podacima - Obrazac PBA3 (ne starije od dana objave javnog konkursa),
- Dokaz da se kandidat nalazi na evidenciji nezaposlenih lica u JU "Služba za zapošljavanje Kantona Sarajevo": Potvrda nadležne službe za zapošljavanje prema mjestu prebivališta kandidata o statusu nezaposlenog lica (ne starije od dana objave javnog konkursa) ili dokaz da je kandidat zaposlen sa nižom stručnom spremom od one koju posjeduje: potvrda poslodavca sa obaveznom naznakom stepena stručne spreme (zanimanja) na osnovu koje je kandidat zasnovao radni odnos kod poslodavca (ne starija od dana objave javnog konkursa).

Naprijed navedenu dokumentaciju, iz tačke D. ovog konkursa, dostavljaju samo kandidati – korisnici prava po Uredbi o jedinstvenim kriterijima i pravilima za zapošljavanje branilaca i članova njihovih porodica u institucijama u Kantonu Sarajevo, Gradu Sarajevo i općinama u Kantonu Sarajevo ("Službene novine Kantona Sarajevo", broj 37/20).

#### **E. Upućivanje kandidata na ljekarski pregled**

Komisija u roku od 15 dana od dana posljednjeg provedenog testiranja kandidate koji su ostvarili najveći broj bodova upućuje na ljekarski pregled u JU Zavod za zdravstvenu zaštitu uposlenika Ministarstva unutrašnjih poslova Kantona Sarajevo. Na ljekarski pregled se upućuje onaj broj kandidata koji odgovara broju oglašanih radnih mjesta. Ukoliko neki od kandidata ne prođe ljekarski pregled isključuje se iz procesa odabira, te se na ljekarski pregled upućuje sljedeći kandidat sa najviše ostvarenih bodova.

Ljekarski pregled kandidata se vrši u skladu sa Pravilnikom o kriterijima i načinu utvrđivanja

zdravstvene sposobnosti policijskih službenika Uprave policije Ministarstva unutrašnjih poslova Kantona Sarajevo ("Službene novine Kantona Sarajevo" br. 44/19 i 50/20), koji je dostupan na internet stranici Ministarstva (u odjeljku Propisi - Propisi MUP).

Metodologija pregleda kandidata objavljena je u prilogu ovog Konkursa na oglasnoj ploči i na internet stranici Ministarstva.

Nepristupanje ili kašnjenje kandidata iz bilo kojeg razloga zakazanom terminu održavanja ljekarskog pregleda smatra se kao odustanak kandidata od podnesene prijave.

#### **F. Ostale važne napomene za kandidate**

Eliminacioni prag predstavlja onaj broj bodova koji je dovoljan za uspjeh kandidata na testu i sticanje prava za pristupanje narednom testu. Ukoliko kandidat ne ostvari eliminacioni prag na određenom testu, tada gubi pravo da pristupi narednom testu i isključuje se iz daljeg izbornog procesa.

Nepristupanje ili kašnjenje kandidata iz bilo kojeg razloga zakazanom testiranju smatra se kao odustanak kandidata od podnesene prijave.

Komisija se stara o redu prilikom provođenja testiranja. Prilikom testiranja nije dozvoljeno korištenje bilo kakvih drugih sredstava (npr. mobiteli i sl.) i materijala, izuzev onih koje Komisija odredi.

Komisija isključuje iz daljeg postupka kandidata koji se ne pridržava uputa o redu i pravila koje odredi Komisija prilikom testiranja i svojim ponašanjem ometa postupak testiranja ili koji prilikom testiranja koristi nedozvoljena sredstava odnosno prepisuje ili zatraži odgovore od drugog kandidata ili koji učini dostupnim odgovore drugom kandidatu.

Obavijesti o datumu, vremenu i mjestu testiranja, kao i sve druge vrste obavijesti koje su od značaja za konkursnu proceduru vrše se putem oglasne ploče i internet stranice Ministarstva (<https://mup.ks.gov.ba/>), te se ovakav način obavještanja smatra urednim u skladu sa odredbama Pravilnika. Ukoliko kandidat ne postupi po ovim obavijestima smatra se da je odustao od dalje konkursne procedure.

Imena kandidata se neće objavljivati, te će se odrediti šifre pod kojim će se kandidati voditi u toku cjelokupnog procesa provođenja javnog konkursa, a sve u cilju postupanja u skladu sa Zakonom o zaštiti ličnih/osobnih podataka ("Službeni glasnik BiH", br. 49/06, 76/11 i 89/11).

Uprava policije ne preuzima obavezu zdravstvene zaštite i osiguranja kandidata za vrijeme postupka izbora.

Trajanje osnovne obuke za kadete iznosi 8 (osam) mjeseci, a po zasnivanju radnog odnosa probni rad traje ukupno 12 (dvanaest) mjeseci.

Prijava na javni konkurs vrši se na propisanom prijavnom obrascu koji je dostupan na internet stranici Ministarstva (<https://mup.ks.gov.ba/>), a koji je objavljen uz javni konkurs, a može se preuzeti i u prostorijama pisarnice Ministarstva. Sve rubrike u prijavnom obrascu moraju biti čitko popunjene uz obavezan svojeručan potpis kojim se potvrđuju navodi iz izjave čiji se sadržaj ne dokazuje posebnim dokumentima, a odnose se na saglasnost za obradu ličnih podataka kandidata.

Kandidat koji se prijavio na javni konkurs, a koji ne ispunjava sve opšte i posebne uslove, izuzev uslova koje Komisija utvrđuje po službenoj dužnosti, odnosno koji nije podnio pismenu prijavu na propisanom obrascu ili prijava ne sadrži tražene podatke ili uz prijavu nije priložio dokumentaciju

utvrđenu javnim konkursom ili nije predao prijavu i dokumentaciju u propisanom roku, Komisija prijavu tog kandidata ne prihvata i istog uvrštava na Listu kandidata koji nisu ispunili uslove za pristupanje testiranju.

Javni konkurs ostaje otvoren 30 dana od dana posljednjeg objavljivanja javnog konkursa u dvije dnevne novine koje se distribuiraju širom Bosne i Hercegovine. Prijava sa potrebnim dokumentima se predaje lično (uz predočavanje identifikacionog dokumenta sa slikom i potpisom) u zatvorenoj koverti, najkasnije u roku od 30 dana od dana posljednjeg objavljivanja javnog konkursa, Upravi policije neposredno na Pisarnicu Ministarstva ili putem preporučene pošte na adresu:

**“Uprava policije MUP-a Kantona Sarajevo, ul. La Benevolencije br. 16, 71000 Sarajevo”,  
sa naznakom “za Javni konkurs - početni čin policajac - NE OTVARATI”.**

Radno vrijeme Pisarnice MUP-a Kantona Sarajevo je od ponedjeljka do petka od 07:30 do 16:00 sati.

Kandidati koji su dokumentaciju uputili preporučenom poštom će biti upoznati o dodijeljenoj šifri telefonskim putem ili putem e-maila, a potvrdu o dodijeljenoj šifri će preuzeti prilikom provođenja testa opšteg znanja.

Potrebni dokumenti-dokazi o ispunjavanju opštih i posebnih uslova javnog konkursa predaju se u originalu ili ovjerenj fotografiji i ne podliježu vraćanju. Kandidati su obavezni uz svoju prijavu predati isključivo dokumentaciju koja se traži ovim javnim konkursom. Nije potrebno dostavljati dokumentaciju kojom se dokazuje ispunjavanje bilo kakvih drugih uslova (kursevi, doškolovanje i slično).

Pored provjere podataka vjerodostojnosti vozačke dozvole, Komisija po službenoj dužnosti vrši i provjeru drugih podataka u slučajevima kada ocijeni da je to neophodno.

Ohrabruju se osobe oba spola da se prijave na ovaj konkurs. U okviru ovog konkursa biće osigurane jednake mogućnosti za sve osobe bez diskriminacije po bilo kojem osnovu.

KOMISIJA ZA IZBOR